

Cla y raspa Prome Minister Evelyn Wever Croes a bisa NO na plan di Otmar Oduber

Gobierno aki no ta bende ningun compania estatal



“**MI** no a les’e ainda, pero mi a tende di dje, Pero for di awor mi ta laga sa cu e Gobierno aki sigur lo no bende ningun compania estatal”, asina Prome Minister Evelyn Wever Croes a bisa cla y raspa na loke t’e plan cu lider di POR, Otmar Oduber pa por haya fondo pa caha di Gobierno, sin cu mester kita ningun hende for di trabao.

Bende accionnan, maske minimal, lo genera un 100 miyon pa Gobierno, Otmar Oduber a duna di conoce. Un plan ambicioso, pero segun conocedornan no realizable bao di Gobierno di Evelyn Wever Croes.

Aparentemente partido POR a discuti e proposicion aki cu varios gremio caba, maske te awor ningun di nan a bin afo y duna nan punto di bista riba dje.

Loke ta masha remarkable, cu Prome Minister Wever-Croes a declara cu e mes no a lesa e ‘paper’ di partido POR cu a keda presenta diabierna den

un conferencia di prensa riba posibel solucionan p’e crisis, Evelyn Wever Croes a sigura cu no ta bay bende accionnan di companianan estatal di Gobierno.

El a bisa cu el a tende di e conmocion cu a surgi di e partido ey, y e por garantisca cu esey lo no sosode. E contenido mes completo, e lo lesa den fin di siman cu a pasa.

Y asina mes, e documento aki di Otmar Oduber y di su partido POR, e mandatario lo manda p’e comision economico financiero analisa, maske adelanta el a bisa caba: “No ta bende nada”

Por conclui cu tin diferencia di opinion den MEP pa cu e proposicion aki, unda tin miembro ta na fabor y otro nan no.

Booshi Wever, lider di UPP, maske su partido no a ser envolvi den dicho presentacion, a haya cu esaki ta un mocion di desconfianza cu Otmar Oduber a duna na Gabinete Wever-Croes.